

**Najib Ziarah Bekas Exco Pemuda Umno, Datuk Zakaria Said  
Bernama  
30 Ogos, 2012**

JITRA, 30 Ogos (Bernama) -- Perdana Menteri Datuk Seri Najib Tun Razak, yang dalam rangka lawatan kerja sehari ke Kedah Khamis, menziarahi bekas anggota Parlimen Kuala Kedah Datuk Zakaria Said.

Najib, yang ditemani isteri Datin Seri Rosmah Mansor, beramah mesra dengan rakan lamanya yang diserang angin ahmar di rumahnya di Bandar Darul Aman di sini.

Turut sama ialah Pengerusi Badan Perhubungan Umno Negeri Kedah Datuk Ahmad Bashah Md Hanipah dan Timbalan Menteri Pertanian dan Industri Asas Tani Datuk Mohd Johari Baharom yang juga Anggota Parlimen Kubang Pasu.

Anak sulung Zakaria, Sazali, 42, berkata beliau yang mewakili keluarganya berbesar hati menerima kunjungan Perdana Menteri yang sudi meluangkan masa melawat bapanya.

Katanya walaupun bapanya tidak dapat bercakap tetapi daripada reaksi yang ditunjukkan, bapanya gembira bertemu dengan rakan lamanya yang kini bergelar Perdana Menteri.

"Datuk Seri Najib berpesan agar kami sekeluarga bersabar dan berharap bapa saya kembali sembuh seperti sediakala," katanya kepada pemberita selepas kunjungan Perdana Menteri.

Zakaria, 68, yang merupakan Exco Pemuda Umno ketika Najib menjadi Naib Ketua Pemuda Umno pada tahun 80-an, kini terlantar sakit akibat angin ahmar sejak 2010.

Pertama kali Zakaria diserang penyakit angin ahmar pada 2006.

Zakaria yang berkecimpung dalam dunia politik sejak 1980-an mula bertanding bagi kerusi Dewan Undangan Negeri (DUN) Anak Bukit pada 1982 dan memenangi kerusi tersebut selama tiga penggal berturut-turut.

Pada 1995, beliau bertanding bagi kerusi Parlimen Kuala Kedah dan berjaya menewaskan bekas Presiden PAS Allahyarham Datuk Fadzil Noor.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=691010>